

# Soek jy 'n fantastiese tutor?

[www.teachme2.com/matriek](http://www.teachme2.com/matriek)



Confidential



# basic education

Department:  
Basic Education  
**REPUBLIC OF SOUTH AFRICA**

## **SENIOR CERTIFICATE EXAMINATIONS/ NATIONAL SENIOR CERTIFICATE EXAMINATIONS**

**ISIXHOSA ULWIMI LOKUQALA OLONGEZELELWEYO (FAL)**

**IPHEPHA LOKUQALA (P1)**

**MEYI/JUNI 2024**

**AMANQAKU: 80**

**IXESHA: liyure 2**

**Olu viwo lunamaphepha ali-14.**

## IMIYALELO NENGACISO

1. Eli phepha lemibuzo linamaCANDELO AMATHATHU angala:  

ICANDELO A:	Uvavanyo lokuqonda	(30)
ICANDELO B:	Ushwankathelo	(10)
ICANDELO C:	Izakhi nemigaqo yokusetyenziswa kolwimi	(40)
2. Phendula YONKE imibuzo.
3. Qala ICANDELO NGALINYE kwiphepha ELITSHA.
4. Krwela umgca ekupheleni kweCANDELO NGALINYE.
5. Nombola iimpendulo zakho ngokuchanekileyo ngokwendlela yokunombola esetyenzisiweyo kwiphepha lemibuzo.
6. Shiya umgca emva kwempendulo ngaNYE.
7. Qwalasela ngokukodwa upelo nolwakhiwo lwezivakalisi.
8. lingcebiso malunga nolwabiwo lwexesha:  

ICANDELO A:	Imizuzu engama-50	
ICANDELO B:	Imizuzu engama-20	
ICANDELO C:	Imizuzu engama-50	
9. Bhala ngokucocakileyo nangokucacileyo.

**ICANDELO A: UVAVANYO LOKUQONDA****UMBUZO 1**

1.1 Funda esi sicutshulwa singezantsi uze uphendule imibuzo elandelayo.

**ISICATSHULWA A****UBOMI BUBOMI NGOVELWANO!**

- 1 Igama elithi, 'uvelwano' ligama abasoloko bethetha ngalo abantu kuba phantse wonke umntu uyakuqonda ukubaluleka kokuba novelwano. Uvelwano lungachazwa ngokuba kukuthatha imeko yomnye umntu uyenze eyakho ukuze uqonde imvakalelo yakhe ngokupheleleyo. Ngokophando lweengcali zengqondo nemikhwa yabantu, babini kuphela ekhulwini abantu abangenalo uvelwano ngabanye abantu. Abo kuthiwa ngabantu abanokuthathwa njengabantu abagula ngokwasemoyeni. 5
- 2 Kuninzi okukhankanyiweyo ngabantu abaziwayo malunga nombawovelwano. Phakathi kwabo singabalula uMaya Angelou, uAlbert Einstein kunye noBarack Obama. NgokukaMaya Angelou abantu banalo uvelwano kodwa into enzima kukulubonakalisa. Kanti ke, okaObama yena uthi uvelwano luyeyona nto idingwa kakhulu ngabantu. Uphinda athi ludingeka ngamandla kuba lwenza ukuba iimeko ezithile zehlabathi zijongwe ngamanye amehlo ukuze kuhlale kulawula uxolo. OkaEinstein yena uxoxa athi, lungekho uvelwano alunakubakho uxolo ehlabathini. Khawufan' ucinge ke ukuba xa singenakubanalo uvelwano singabantu kungayintoni ebomini? 10 15
- 3 Kukwakho iingcaphephe zoogqirha bengqondo ezibethelela ukubaluleka kovelwano ebantwini **ukuze** kukhule ubuntu eluntwini. Kwingxoxo yazo zihambisa zithi, zintathu iindidi zovelwano. Ezo ndidi zezi: uvelwano lweengcinga, apho umntu akwaziyo ukuqonda indlela anokuba ucinga ngayo omnye umntu. Olunye udidi luvelwano lwemizwa, oluthi lona lumenze onalo azibone esosuleleka ziimvakalelo zomnye umntu. Olwesithathu udidi luvelwano lwezenzo, lona oluthi lumqhube onalo ukuba anqwenele ukumnceda loo mntu avelana naye. Xa ubani emamele le nkcaza yezi ndidi zovelwano, angatsho ukuba zontathu ziyadingeka emntwini ngamnye. 20 25
- 4 Uvelwano luneziphumo ezihle nakwintlalo yasemakhaya. Emakhayeni ethu xa sithe saba ngabantu abanovelwano omnye komnye, kukhula inceba, ubuhlobo nemvisiswano phakathi kwezihlobo nezalamane. Buhlobo obo obude buphumele nakubantu esingabaziyo. Nangona kunjalo, akulindelekanga ukuba kwintlalo yosapho kusoloko kuvunyelwana ngayo yonke into. Okubalulekileyo kukuba xa abantu bezama ukucingelana, ubomi buba lula kakhulu kumntu wonke. Uvelwano kumalungu osapho lwenza ukuba kube lula kuwo ukuyamkela into yokwahluka kwawo ngeendlela zokucinga nokwenza. 30 35

	Kuninzi ukugxekana de omnye umntu azive engathandwa okanye engaxabisekanga kusapho lwakhe xa kukho <b>ukungaboni ngasonye</b> . Uvelwano ke ngoko lungasisisombululo sokoyisa iingxaki ezinjengezo. 40
5	Abantu abakwizikhundla zokuphatha baye bahlangane neengxaki eziliqela ngenxa yobunzima bokukhokela abantu. Kaloku <u>ebomini umntu ngamnye unendlela yakhe yokucinga nokwenza izinto</u> . Kubalulekile ke ngoko ukuba iinkokeli nazo zihlale zikhumbula ukuba izenzo zazo nezigqibo ezizithathayo zinendlela ezibachaphazela ngayo abo bantu zibakhokeleyo. Ngalo lonke ixesha kulindeleke ukuba iinkokeli zibonakalise uvelwano ebantwini. Xa inkokeli ingabonakalisi velwano kubasebenzi itolikwa njengenkokeli ebacinezeleyo abo basebenzi. Ngenxa yoko iziphumo zenkampani zirhuqe kumgangatho osezantsi. Kwelinye icala, inkokeli enovelwano ngakubasebenzi ikhuthaza umoya wentsebenziswano. Kwakuba njalo ke, iziphumo zenkampani zihlale zikwizinga eliphezulu. 45
6	Kwihlabathi jikelele, amazwe ehlabathi ayalubonakalisa uvelwano. Umzekelo, xa ilizwe elithile lehlelwe yimeko embi nebuhlungu kuba kubi kulo, angenelele amanye, alincede. limeko ezo zezifana nomonakalo obangelwa yimozulu; ukutshabalala okwenziwa yimililo; imilo kunye neemfazwe ezishiya izidumbu zabantu <u>zidunduluzile</u> . Isenzo samanye amazwe ehlabathi sokunceda nokuhlangula abantu belizwe elisengxakini siyinika intsingiselo intetho ethi, umntu ngumntu ngabantu. Olu udidi lovelwano ke lubizwa ngokuba luvelwano olubonakaliswa ngabantu kubantu abangabaziyo. 55
7	Kukho uluvo oluthi wonke umntu uzalwa enalo uvelwano. Kukwakho nolunye olubethelela ukuba abantwana bangakhuliswa ngendlela ebafundisa ukuba babe ngabantu abanovelwano. Nokuba ubani uhambisana noluphi na uluvo, okubalulekileyo kukuba abantwana bakhule befundiswa ukuba novelwano ukuze ihlabathi limiwe ngabemi abanovelwano nobuntu. Ngokufutshane, uvelwano ludala ubudlelwane obuhle phakathi kwezizalwane nasemisebenzini, ngenxa yokukokosana nokukhathalelana kwabantu. Alupheleli apho, lunwenwela kwihlabathi jikelele kuba abantu baphela sebekhathalela nabantu abangabaziyo. Ngalinye ubani angathi uvelwano luphawu lobuntu. 60
[Sithatyathwe ku <a href="http://www.pirelli.com">www.pirelli.com</a> , saze saguqulelwa, salungiselelwa uviwo]	

### Jonga kumhlathi 1

- 1.1.1 Nika isizathu sokuba abantu basoloko bethetha ngegama 'uvelwano'. (1)
- 1.1.2 Xela ukuba yintoni uvelwano ngokwalo mhlathi. (2)
- 1.1.3 Caphula kulo mhlathi ulwazi olusixelela ukuba bambalwa abantu abangenalo uvelwano. (1)

**Jonga kumhlathi 2**

- 1.1.4 Cacisa indlela ezifana ngayo izimvo zikaEinstein nezikaBarack Obama ngokwalo mhlathi. (2)

**Jonga kumhlathi 3**

- 1.1.5 Nika intsingiselo eziswa ligama, 'ukuze' elibhalwe ngqindilili kulo mhlathi. (2)

- 1.1.6 Chaza ukuba luyintoni uvelwano lwemizwa. (2)

**Jonga kumhlathi 4**

- 1.1.7 Nika ngeengongoma eziMBINI iziphumo zovelwano kusapho ngokwalo mhlathi. (2)

- 1.1.8 Khetha impendulo echanekileyo kwezi zilandelayo.

Ibinzana 'ukungaboni ngasonye', elibhalwe ngqindilili ngokwakwiscatshulwa lithetha ...

- A ukuthandana phakathi kwamalungu osapho.  
 B ukuxolelana phakathi kwamalungu osapho.  
 C ukungavisisani phakathi kwamalungu osapho.  
 D ukuqhelana phakathi kwamalungu osapho. (1)

**Jonga kumhlathi 5**

- 1.1.9 Yinyani okanye luluvo inkcaza ekrwelelwe umgca ngaphantsi kwiscatshulwa? Xhasa impendulo yakho. (2)

- 1.1.10 Ngqina ngokwalo mhlathi ukuba inkokeli enovelwano ngakubasebenzi iyayikhulisa inkampani. (2)

**Jonga kumhlathi 6**

- 1.1.11 Nika umfanekiso-ngqondweni oziswa ligama, 'zidunduluzile' elikrwelelwe umgca ngaphantsi kule nkcaza ilandelayo:  
 ... ezishiya izidumbu zabantu zidunduluzile (1)

- 1.1.12 Xela ukuba usifundisa ntoni lo mhlathi ngovelwano. (2)

**Jonga kumhlathi 7**

- 1.1.13 Nika injongo yokuba abantwana bakhule befundiswa ukuba novelwano ngokwalo mhlathi. (2)

**Jonga kwitekisi yonke**

- 1.1.14 Esi sicutshulwa siludidi lwetekisi (echazayo/ebalisayo). Xhasa impendulo yakho. (2)

1.2 Funda lo mfanekiso ungezantsi uze uphendule imibuzo elandelayo.

**ISICATSHULWA B: OKUBONWAYO**



[Ithatyathwe ku-[www.istockphotos.com](http://www.istockphotos.com)]

- |       |  |     |
|-------|--|-----|
| 1.2.1 | Xela umahluko ngokobudala kwaba bantu bakulo mfanekiso.                        | (2) |
| 1.2.2 | Ucinga ukuba bavakalelwa njani uLez noSue? Xhasa impendulo yakho.              | (2) |
| 1.2.3 | Sibonisa ntoni ngoLez isenzo sakhe sokuncedisa uSue ukuba aphakame esitulweni? | (2) |

**AMANQAKU ECANDELO A: 30**

**ICANDELO B: USHWANKATHELO****UMBUZO 2**

ISICATSHULWA C esingezantsi simalunga nezinto ezenziwa ziimbaleki eziphumeleleyo ezinokufundwa ngoosomashishini.

Funda isicatshulwa C esingezantsi uze ubhale iingongoma eziphambili unika izinto ezenziwa ziimbaleki eziphumeleleyo ezinokufundwa ngoosomashishini.

**IMIYALELO**

1. Bhala isishwankathelo sibe kwimo yeengongoma ungadluli kumagama angama-60.
2. Nombola izivakalisi zakho ukusuka ku-1 ukuya ku-7.
3. Sebenzisa izivakalisi ezipheleleyo ukubhala iingongoma.
4. Sebenzisa AMAGAMA AKHO kangangoko unako.
5. Bhala inani lamagama owasebenzisileyo kwizibiyeli ekupheleni kwesishwankathelo.

**ISICATSHULWA C****OOSOMASHISHINI BANGAFUNDA LUKHULU KWIIMBALEKI**

Ngokufunda kwizimbo neengqondo zeembaleki ezikwizinga eliphezulu, oosomashishini bangakwazi ukuqonda okubalulekileyo abanokukuthabatha kwimpumelelo yeembaleki, bakusebenzise kwezoshishino. Naku okwenziwa ziimbaleki eziphumeleleyo okunokufundwa ngoosomashishini:

Iimbaleki eziphumeleleyo ziqala ngokuzibekela injongo engundoqo ezifuna ukuyifezekisa ze ziyilande. Usomashishini kanye njengeembaleki, makaqale ngokwazi eyona nto ajonge ukuyifezekisa kwishishini lakhe. Oko kuza kumnceda ukuba azibekele iinjongo anakho ukuzifikelela.

Akululanga ukumelana noxinzelelo ebomini. Iimbaleki eziphumeleleyo ziloyisa uxinzelelo, ngokuluthabatha ngokuba lulithuba lempumelelo. Oosomashishini, njengeembaleki mabazifundise ubuchule bokulawula ngokuqiqa iimeko zamashishini abo naphantsi koxinzelelo. Ukuzinikela ngokupheleleyo nokukwazi ukuzilawula zezinye zezinto ezenziwa ziimbaleki ezikwizinga eliphezulu. Kaloku, ukuzinikela nokuzilawula kufuna umntu oziqeqeshayo.

Iimbaleki ekumgangatho ophezulu imilisela ingqondo namandla kwinyathelo eza kulithabatha kumsebenzi ophambi kwayo. Oosomashishini, njengeembaleki mabafunde ukumilisela iingqondo ekufezekiseni okubalulekileyo ngexesha elithile kwiinkqubo zeshishini.



Kwakhona, iimbaleki ziluthabatha ukhuphiswano njengethuba lokuqinisa ukusebenza nzima nokuziphucula. Njengeembaleki, oosomashishini mabaluthathe ukhuphiswano phakathi kwabo namanye amashishini njengethuba lokuziphucula. Kaloku iimbaleki eziphumeleleyo zisebenza ngamandla nokuba sekunzima kuba zisazi ukuba leyo yeyona ndlela yokuphumelela.

Iimbaleki eziphumeleleyo ziyakwamkela ukuba kwezemidlalo umntu angaphumelela okanye angaphumeleli. Kubalulekile ukwamkela xa uthe awaphumelela ngelinye ixesha. Oosomashishini nabo njengeembaleki eziphumeleleyo mabafunde ukwamkela xa bathe bawa kwimizamo yabo ngeengqondo ezivulekileyo ukuze bafunde kuloo mava.

Iimbaleki eziphumelele izandla zisoloko zifunda ulwazi olutsha ngeendlela zokuzigcina zikwizinga eliphezulu. Ngoko ke usomashishini xa athe wasebenza ngempumelelo lasemgangathweni ophezulu ishishini lakhe, makazame ukulibamba elo zinga.

Kuninzi okunokunceda oosomashishini kwiimpawu nemikhwa yeembaleki. Nokuba abangebi nakho ukugqwesa ebaleni njengazo, bangagqwesa njengazo kushishino lwabo.

[Sithatyathwe [kuwww.entrepreneur.com/author/deep-patel-saza](http://kuwww.entrepreneur.com/author/deep-patel-saza) saguqulelwa, salungiselelwa uviwo]

**AMANQAKU ECANDELO B: 10**

**ICANDELO C: IZAKHI NEMIGAQO YOKUSETYENZISWA KOLWIMI****UMBUZO 3: ISIBHENGEZO-NTENGISO**

Funda esi sibhengezo-ntengiso singezantsi uze uphendule imibuzo elandelayo.

**ISICATSHULWA D**

**KWARANDY**

**IINGCALI EKUKHATHALELENI INGCA YAKHO NGOKUPHELELEYO!**

Singakunceda nangoku:

- \* Ukuncothula ukhula.
- \* Ukuphungula iheji.
- \* Ukuthena imithi.

Sithembakele KWAYE  
sicheba ngamaxabiso afikelelekayo.

Isisulu sale nyanga  
kuphela.

Isaphulelo se 10%

Tsalela umnxeba kule nombolo, sikuhlolele iyadi yakho simahla:  
021 764 8900 ntsuku zonke. Yiya ku-www.randyl.com

[Uthatyathwe [kuwww.pinterest.com](http://kuwww.pinterest.com) waza wahlelwa, walungiselelwa uviwo]

- 3.1 Khetha impendulo echanekileyo kwizibiyeli. Kule ntengiso kubhengezwa (imveliso/inkonzo). (1)
- 3.2 Khetha impendulo echanekileyo kwezi zilandelayo. Igama, 'kwaye' elibhalwe ngamagama amakhulu kwisibhengezo-ntengiso lizisa intsingiselo ...
- A yokuphungula ulwazi.
  - B yokuthelekisa ulwazi.
  - C yokongeza ulwazi.
  - D yokuchasanisa ulwazi.
- (1)

- 3.3 Xela ulwazi oludluliswa libinzana, 'singakunceda nangoku ... 'elikrwelelwe umgca ngaphantsi; kwisibhengezo-ntengiso. (1)
- 3.4 Cacisa ukuba kuhambelana njani ukusetyenziswa kwamagqabi akumfanekiso okwesi sibhengezo kunye nomyalezo waso. (2)
- 3.5 Caphula ulwazi olusixelela ukuba isaphulelo ekuthenjiswa ngaso umthengi sesethutyana. (1)
- 3.6 Nika injongo yokusetyenziswa kwegama, 'sithembakele' kwesi sibhengezo ntengiso. (2)
- 3.7 Ingaba esi sibhengezo-ntengiso singawutsala umdla wabathengi? Xhasa impendulo yakho. (2)
- [10]**

**UMBUZO 4: IKHATHUNI**

Funda le khathuni ingezantsi uze uphendule imibuzo elandelayo.

**ISICATSHULWA E**

[Ithatyathwe ku-[www.cartoonistgroup.com](http://www.cartoonistgroup.com) yalungiselelwa uviwo]

- 4.1 Xela ukuba bangaphi abalinganiswa abakule khathuni. (1)
- 4.2 Yintoni ebonakalisa ukuba nguLisa yedwa othethayo kwisakhelo soku-1? (1)
- 4.3 Khetha impendulo echanekileyo ibe NYE kwezi zilandelayo.  
Igama, 'sana' elikwisakhelo sesi-2 lisetyenziswe ngenjongo ...  
 A yokuqhayisa.  
 B yokukhuthaza.  
 C yokugxeka.  
 D yokuthuka. (1)
- 4.4 Sibonisa ntoni ngoLisa isenzo sokubuza imibuzo ilandelelane kwisakhelo sesi-2? (1)
- 4.5 Lisixelela ntoni ngoLindi ibinzana, 'Kuhle kakhulu' elikwintetho yakhe ekwisakhelo sesi-3 malunga neyoga? (2)
- 4.6 Chaza ukuba umzobi usibonakalise njani isihlekiso kwisakhelo sesi-4. (2)
- 4.7 Ingaba uLisa ubonakalisa umdla kulwazi alufumana kuLindi malunga neeklasi zeyoga? Xhasa impendulo yakho. (2)

**[10]**

**UMBUZO 5: IPROZI**

5.1 Funda esi sicutshulwa singezantsi uze uphendule imibuzo elandelayo.

**ISICATSHULWA F**

**IQELA LASEMZANTSI AFRIKA LILIBETHELE KOWALO  
ELASECAMEROON!**

Iqela loMzantsi Afrika lifumene impumelelo ebalulekileyo. Oku kwenzeka emva kokuba linqwamzele ekhaya elaseCameroon ngamanqaku amathathu kwelinye emdlalweni obutaka iintlantsi e 'Omni Sports Stadium' kwisixeko saseGaroua, eCameroon. Eli qela lingene kakuhle ebaleni lagqagqanisa okomgqakhwe ugoduka. 5

Kwimizuzu elishumi yokuqala, iqela laseMzantsi Afrika beliphambili ngenqaku elinye elifakwe ngumdlali oyingozi, uCassius Mailula – obhakuzelise umnatha emva kwempazamo eyenziwe ngumdlali wasemva waseCameroon. Kugqithe imizuzu nje yamibini, uMnu. Tapelo Morena wafaka inqaku lesibini emva kokudlalwa ibhola entle nguMailula. Lizamile ukuphendula iqela laseCameroon ebeliphantsi koxinzelelo – kodwa ibhola yalo ibethe epalini, ayangena emnatheni. UMailula ufake inqaku lesithathu leloMzantsi Afrika, kwathi **xibilili** izibilini kubalandeli ngoba yonke into ibiseyicalanye. 10

[Sicutshulwe kwi-*Isolezwe*, 17 eyoMdumba 2023, salungiselelwa uviwo]

5.1.1 Xela ukuba igama elikrwelelwe umgca ngaphantsi kwisivakalisi esingezantsi lisenzi okanye lisisibizo.

Eli qela laseMzantsi Afrika lifumene impumelelo ebalulekileyo. (1)

5.1.2 Chonga isichazi kunye nesibizo kwesi sivakalisi singezantsi.

Kufakwe amanqaku amane emdlalweni.

Cwangcisa impendulo yakho ngolu hlobo:

- (a) Isichazi
- (b) Isibizo (2)

5.1.3 Nika isizathu sokushiywa kweceba kwisibizo esibhalwe ngqindilili ngezantsi.

Eli **qela** lingene kakuhle ebaleni. (2)

5.1.4 Lisetyenziswe njani igama elikrwelelwe umgca ngaphantsi kwesi sivakalisi silandelayo?

Umdlali ufaka ibhola emnatheni. (1)

- 5.1.5 Bhala ngokupheleleyo igama elifinyeziweyo kwesi sivakalisi singezantsi.  
UMnu. Tapelo Morena ufake inqaku lesibini emva kokudlalelwa ibhola entle. (1)
- 5.1.6 Nika isithethantonye segama elikrwelelwe umgca kwesi sivakalisi silandelayo.  
UMnu. Tapelo Morena ufake inqaku lesibini emva kokudlalelwa ibhola entle. (1)
- 5.1.7 Leliphi igama elisisihlomelo sendawo kwesi sivakalisi silandelayo?  
Ibhola yayo ibethe epalini ayangena. (1)
- 5.1.8 Khetha isifanekisozwi kwisivakalisi esingezantsi.  
UMailula ufake inqaku lesithathu kwathi xibilili izibilini kubalandeli. (1)
- 5.1.9 Nika igama elinye endaweni yebinzana elikrwelelwe umgca ngaphantsi kwesi sivakalisi singezantsi.  
... emdlalweni obutaka iintlantsi. (1)
- 5.1.10 Guqula esi sivakalisi silandelayo sibe kwingxelo ntetho.  
UCassius Mailula uthe, 'Ndivuye kakhulu ndakufaka inqaku.' (3)

5.2 Funda lo mfanekiso ungezantsi uze uphendule imibuzo elandelayo.

### ISICATSHULWA G: UMFANEKISO



[Uthatyathwe ku-[www.gettyimages.com](http://www.gettyimages.com) waza wahlelwa]

5.2.1 Guqula esi sivakalisi sibe kwimo elandulayo.

UJane uyazilolonga. (2)

5.2.2 Yakha isivakalisi esinye ngezi zivakalisi zilandelayo ungasebenzisanga sihlanganisi.

UJane uyavuka. UJane uyazilolonga ekuseni. (2)

5.2.3 Sebenzisa isimamva esichanekileyo ukuze esi sivakalisi sinike intsingiselo.

UJane (uzilolonga) imidlalo yehlabathi. (2)  
[20]

**AMANQAKU ECANDELO C : 40**

**AMANQAKU EWONKE : 80**